

## Ün on pretensius pel CSEB

**L'on da gestiun 2020 es stat pel Center da sandà Engiadina Bassa pretensius e difficil. Adonta da las circumstanzas pervi dal coronavirus es il quint annual congualabel cun quel da l'on avant.**

Daspö passa 14 ons collavuran in Engiadina Bassa furniturs regionals importants dal provedimaint da sandà, da la chüra, da la chüra d'attempats e dal bainesser suot il tet dal Center da sandà Engiadina Bassa (CSEB). La via cumünai vla d'eira ed es amo adüna innovativa. L'organisaziun sgüra il provedimaint da sandà e d'urgenza, la chüra staziunara ed ambulanta e la sporta dal Bogn Engiadina Scuol.

### Cun üna sporta vasta

Cun passa 450 collavuraturas e collavuratur es l'interpraisa da grond'importanza economica per la regiun. «Grazcha al svilup dal CSEB po gnir garanti il provedimaint da sandà in nosssa regiun periferica e quai cun üna sporta vasta e dad ota qualità», manzunan ils respunsabels dal CSEB i'l rapport annual. Cul svilup consequaint dals servezzans po il CSEB prestar üna contribuziun essenziala e da buna qualità tant pel provedimaint sco eir per la vita da la populaziun indigena e pels giasts. «Ushè pon gnir coordinadas las sportas dals differents servezzans optimalmaing, quai a favur da las paziaintas e dals paziaints, dals cliaints, da las abitantas e'ls abitants e dals giasts», es l'avis dals respunsabels dal CSEB.

L'on da gestiun da l'Ospidal Scuol es stat suot l'insaina dal coronavirus. Infra pacs dis davo cha'l prüm lockdown d'eira entrà in vigur stavian a disposiziun 55 lets per cas acuts e quatter plazzas cun apparats da reanimaziun. Il numer dals paziaints staziunaris s'ha redot l'on passà per 7,6 pertschient sün 1233 e quel da paziaints ambulants s'ha sbassà per 17 pertschient. Grazcha a las contribuziuns da cumpensaziun dal Chantun e dals cumüns po il CSEB preschantar ün rendaquint congualabel cun quel da l'on avant. Il s-chavd da passa 650000 francs es be pac plü ot co quel i'l preventiv.

Annatina Filli/FMR



**L'Ospidal da Scuol ha gnü l'on passà damain paziaints co üsità.**

fotografia: CSEB